



## 2026 IQALUNNI SULINIRARUTI

**15-giliqtanga Katimavijjuarniq Inuit Ukiuqtaqtumiuqatigiit Katimajinginnut (ICC)**  
**Julai 22–mi 25-mut, 2026 Iqaluit, Nunavummi, ammalu Katimavijjuarnirmik taiguusinga**

### ***INUIT TAPIRIIT NUNARJUARMI***

**Nalunaiqsikannirniq** Inuit Ukiuqtaqtumiuqatigiit Katimajiit (ICC) Nunaqaqqaqsimajunut Katujjiqatigiingummat kiggaqtuillutit amma nipigijaullutit atausiuqatigiinnikkut Inunnut nunarjuarmi piliriniujunik atuqtuta ilagijaujunik kiggatuqtigijattinnut pilirivini amma katujjiqatigiinik Inuit Nunangani, Inuit nunanginni Sukakkami (Ulaasia), Alaaska (Amialigait), Kanata amma Kalaallit Nunaanit (Akukittuq),

**Nalunaiqtauluni** Inuit atausiuqatigiinninga taassuminngassainnaq nunaqaqtutik, iliqqusiqatigaqtutik, pimmarigijaqaqtutik, uqausiqaqtutik amma inuuqatigiittutik, ilisarijaulluni Inuit Ukiuqtaqtumiuqatigiit Katimajingita iqqanaijaangit tunngaviqarmat Nunaqaqqaqsimajut qaujimajatuqanginni amma kamagijariaqaqtavut inuuqatittinnut Inuit Nunanganilimaaq. Avititausimajut aviktuqsimaniujunik nunalirjuani, qallunaanut piusituqausimajut, uvvaluunniit akitturautiniujut aviktuqsimaniujunik pijumanirijaujut suraijunnangittuq atausiqatigiinnirijattinni amma sannginirijattinni,

**Nalunaiqsikannirniq** Inuit Ukiuqtaqtumiuqatigiit Katimajingit angiqsimattiarmata sanngatigiatitaukkanirninga Inuit atausiuqatigiinninga; sivumuaqtauningit Inuit pijunnautingit amma pijumanirijangit nunarjualimaamik; paannaivallianiq akuniujut atuagarniq sapummijauqullugit Ukiuqtaqtuup avatinga amma Inuit Ukiuqtaqtumiuqatigiit Katimajingit turaagaqaqtut atangiijumik amma atuutiqaqtumik ilauqataunginnirijanganut ammalu tukiqattiatukkut katimaqatigaqattarlutit inunnik pijjutiqaqtunik gavamalirinirmik, kiinaujaliurasuarnirmik, iliqqusilirinirmik inuusilirinirmut pivalliatittinirmik Ukiuqtaqtumi,

**Nalunaiqsikannirniq** Inuit Ukiuqtaqtumiuqatigiit Katimajingita angiqsimattiarninga nunarjualimaaq maliganginnut amma aviktuqsimaniujut suliniujut amma saqqijaaqtittilit, sapujjilit amma ippigusuttiarlutit Inuit pijunnautinginni, piqasiutilugit Nunaqaqaaqsimajut pijunnautingit, **nalunaiqsilutit** sailiniq amma makimattiarniq Ukiuqtaqtumi aviktuqsimaniujunik piruqsaimmat gavamalirijiniq piliriqatigarnirmik amma nunalirjuanik aviktuqsimaniujunik inunnik inunnut piliriqatigiinni, amma ippigusuttiarluni amma piliriqatigattiarlutit Ukiuqtaqtumi Nunalirjuangujunik, namminisurunnaqtut nunalirjuat amma inungit,

**Quviasuutigilugu** Inuit Ukiuqtaqtumiuqatigiit Katimajingita 50–gilaaliqta quviasuutiqarniq 2027–mi, saqqilauqsimajuq avatilirinirmut nunarjuamillu attanaqtumiitillugu, **nalunaiqsilluni** inunnut aulattitillugit, Inuit piruqpalliattiarluni, **nalunaiqsillunilu** aaqqissimattiangittumiiliratta gavamalirinirmik nunarjuarmi, ammalu **nalunaiqsikkannirluni** ICC–kut ajiungittumik iniqarmata kiujunnarlutik ammalu **kamagijaqarunnaqtutik** nutaanik aksurnaqatunik Inuit Nunalimaanginni tunngaviqarluni sangijummarikkut piusituqarisimajavut Ukiuqtaqtumi piliriqatigiinnikkut, katujjiqatigiinnikkut atausuqatigiinnikullu, amma sivumuaqtillugit sulillarittukkut sanaqatigijauningit aaqqigutissaujut Ukiuqtaqtumi aippaqlutit inunnit amma aviktuqsimaniujunik nunalirjuanik piliriqatigiinnikkut,

**Nalunaiqsikannirniq** tunngaviqatigiinnitinni, attuanigarnittinnik, kasuumaqatigiinnittinnik, ammalu avittaujunnangittunik pijunnautinik nalunaiqtausimajut *Nunarjuarmi Katujjiqatigiit Sulinirarutingani Nunaqaqaaqsimajut Pijunnautinginnut* (UNDRIP), piqasiutilugu pijunnautivut namminiqsurunarnirmut, tamanna sivulliujausimajariaqarmat atuqtauninganut ammalu quviagijauninganut Inuit pijunnautinginnik inuuluta, ammalu **ilisarijauluni** 20–giliqtanga nalliuniqsiurniq UNDRIP 2027–ngulaaqtumi, amma UNDRIP siammattirilaaquq ICC–kut iqqanaijaalimaattianginni. Taanna UNDRIP kamagijaqaqtuq Nunarjuarmi Katujjiqatigiit ilisarijauluni pilirianginnik,

**Qujannamiiqpavut** Avannaata Kommunia tunngasuttittilaurningani 2023–mi Katimajaqtuqsimajunik Katimaningani Ilulissat, Kalaallit Nunaanit, saniani qarisaujukkat katimavijjuarningani 2022–ngulauqtumik nuvajuarnautillugu, **nalunaiqsijuq** pimmariumingani upagutisimaginiq katimavijjuarniujut amma **tunngasuttittilluni** unikkaaminik,

**Quviasuutiqarniq** 50–giliqtangani 1–ngata Ukiuqtaqtumi Inuit katimavijjuarningani iqqaumajaulauqtuq Ukiuqtaqtumi Inuit katimavijjuarningani 2023–mi ilulissat, Kalaallit Nunaani, **nalunaiqtaulluni** *Ukiuqtaqtumi Inuit katimavijjuarningata uqaussanga 2023-mi*, piqasiutilugu angiqsimanirijangaq aviktuqsimaniujunik nunalirjuat amma inunnik inunnut piliriqatigiinniujuq Ukiuqtaqtumi, ammalu **tunngasuttittillutik** saqqitauningata *Pijunnaqtaaqattittiniq Ukiuqtaqtumi Nunaqaqaaqsimajut: Quviasuutiqarniq 50-Nik Arraagunik Nunaqaqaaqsimajut Gavamaqatigiissimaningi*,

**Tunngasuttitauningit** unikkaat unikkaarijaulauqtut 15–giliqtangani Inuit Ukiuqtaqtumiuqatigiit katimajinginnut amma quviasuutiqarniq iqqanaijaariausimanik ICC–kut allavvilimaattianginnut, piqasiutillugu ICC Sukakkami sivuliqtunirilauqtanga katitittitillugit nunaqaqqaaqsimajunut uqausilirinirmut katimaniulauqtuq ilinniasinnaa Sukakkami vivvuari 21, 2024–mi, Nunarjualimaamik Uqausiit Ullungani, ammalu **iqqaumajauningit** ICC Sukakkami iqqanaijaarisimajangit makitittinasuarnirmut, saqqijaaqtittinirmik, amma sapujjausimaninginni Inuit uqausingit, ammalu

**Qujannamiiqpavut** inungit Iqaluit, Nunavummi, amma Nunavut Tunngavik Timinga, tunngasuttittilaurninginni ICC–kut 15–giliqtanga Katimavijjuarniq, amma sivulliqaangulluni upagutisimanikkut Katimavijjuarniulauqtuq taimanngani 2018–minik,

### **KATIMAJAQTUQSIMAJUT ICC 15–GILIQTANGANI KATIMAVIJJUARNIRMUT KIGGAQTUILLUTIT INUNNIK SUKAKKAMI, ALAASKAMI, KANATAMI AMMA KALAALLIT NUNAANIMIUTANIK, TAVVUUNA**

1. **tunngasuttitauluni** amma **angiqtauluni** ICC Unikkaanga Qanuiliurutausimajunut 2022–mi 2026–mut amma **ikajuqsurlugit** aulajjaigiarutissait kajusititauqullugit amma pilirijaukkaniqullugit iqqanaijaarijaujut qanuilirutauqullugit sivulliqpauqujat amma isumaaluutaujut tavvanni nalunaiqtausimajut Inuqutittinnut;

### **Nunaqaqqaaqsimajunut Pijunnautiit, Sailiniq, Sapujjausimaniq, Amma Piliriqatigiinniq Inuit Nunanganilimaattiaq**

2. **Nalunaiqsiluta** Inuit nunaqaqsimammata Ukiuqtaqtumi taimanngatuqaalunni, nunaqaqtutik amma makimattiarмата Inuit nunaqutinginni, atangiqtuta taivattavut Inuit Nunanga, **tiliurivattut** ICC–kunni sanngatitausimainnaqullugu inigijanga inunnut ajjiunatit Ukiuqtaqtumi Nunaqaqqaaqsimajut, ammalu ilisarijauttiarlutillu Inuit amma tukiqattiatukkut ilautitauqattarlutit nunarjuarmik gavamalirinirmik amma isumaliurutaujunik qanulimaattiaq;
3. **Nalunaiqsikannirluta** pijunnautittinnik sivulitta nunaqutinginni Inuit Nunangani piqasiutilugit pijunnautingit atuni aviktuqsimaniujut ammalu nunaliit atuinnaqaqullugit ammalu isumaliurunnaqullugit pijutigillugit atuqtauvanningit kamagijauttiarningillu nunavut imaqtivullu ammalu **tilisiluta** ICC–kunni tigusiqattaqunagit kappiasaarjunik Inuit pijunnautingita mitsaanut piqasiutilugit pinasuarutaujut silataaniinngaaqsimajunik Inuit Nunangani Inuit atuqattaqsimajanginnut amma nunagisimajattinnut arraagugasaalunnut ammalu tamakkua iliqqusinganut kinauningit, niqiqattiarqarninginni, ammalu tamakkua attuanijut pimmarialuummata uvagut

iliqqusituqakktut kinaunnittinut, niqiqattiaavannirmut, amma kinguvaariinut qaujimanirijaujunut;

4. **Tiliurlugit** gavamalimaat atuliqtittiqullugit malittiaqullugillu mikiniqpaanik maligarnik aaqqittausimajunik UNDRIP–mi nunarjualimaamik inunnut pijunnautiit atuqtaujunnaqullugit inulimaattianut, ilisarijaujariaqaqtut, sapujjausimagiaqaqtut, ammalu atuqtauninginnik Inuit pijunnautingit ammalu katujjillutik pijunnautinik, ammalu **nalunaiqtaukannirluni** Inuit quviagijaqarningit iluunnanginni Inuit pijunnautinginni titiraqtausimajut atangiqtututik Inuit pijunnautinginnik;
5. **Tiliurlugit** ICC–kut saqqijaaqtittiinaqattaqullugit, sapujjisimainnarlutit ammalu sivumuattittilutit inutuujunut inunnut ammalu atangiijunut pijunnautinik inunnut, angiqattangillugit katitijjutaunasuttut Nunaqaqqaaqsimajut taiguusingit mikillivaallirtaujuunaqtut pijunnautittinnik, ammalu saqqijaaqtittilutillu, sapujjisimalutillu ammalu sivumuqaqtittilutillu Inuit qaujimatuaqanginnik - piqasiutillugit uvagut Inuit qaujimajatuqangit – ajjiungimmata aaqqiumammatalu qaujimanirijavut, kasuumaniaqtuni namminirijattinnut qaujimanirijattinnut kasuumatittinirmik;
6. **Nalunairlugu** ICC–kut kiggaqtuinirijangit inulimaattianik ilagijaujunut kiggaqtuijujut Inuit katujjiqatigiinginnut amma pilirivittinnut, ammalu ICC kiggaqtuqtaujuq inunnut sivuliqtinut niruaqtauvattunut tikkuqaqtatinnullu, ammalu **tiliurivattut** gavamalimaanik kajusittittiqullugit atangiijumik atuutiqaqtatimillu ilautittinirmik amma tukiqaqtatimillu ilautittinirmik inunnik kiggaqtuijingitigut sivuliqtinik ammalu **tiliuqtugit** ICC–kut saalaqarasuaqullugit tammaqsimajunik kiggaqtuiniujunik ammalu atuni ammalu atangiijumik Inuit kinauninginnik silairrijainiuvattunik;
7. **Tiliurlugit** ICC–kut sivuliqtingit ICC–kut iniqarmata attanangijumik amma ilautittisimammata inulimaattianik ukiuqatigiingikkaluaqpata, arnaugaluaqpata angutaugaluaqpata, aippa qaraluaqpata arnauqatigingitaminik angutaqatigingitaminik, uppirnirijangillu, inuuqatigiit namiinninginnilu, ajurutiaqaqtunik, qaujimaniaqaqtut iliqqusitta qaujimanirijanginni uvvaluunniit uqausinginni;
8. **Nalunaiqsikannirluni** *Ukiuqtaqtumi Inuit sulinirarutingani namminiqarnirmik Ukiuqtaqtumi, Ukiuqtaqtumi Inuit sulinirarutinga nunamiutanik tunngavigijaujuq Inuit Nunangani*, ammalu ICC *Piqujivungaarutinga 77-11 Saimanaqtukktut Ammalu Attanangittukktut Atuqtauqattarmat Ukiuqtaqtumi Nunarjuarmi Ukiuqtaqtuup Agguqtuqsimaninganut*, **tiliurlugit** ICC Aulattijiit Katimajinginnik nutaannguriaqtitaqullugu ICC–kut *Inuit Ukiuqtaqtumi Atuaganga* amma **tiliurlugit** ICC–kut ajauqtuiqullugit atuliqtitauningani uuma nutaannguriaqsimajuq atuagaq nunarjualimaatigut Ukiuqtaqtumi ikajuqsuiniujuq;

9. **Nalunairlugu** katujjinikkut pigiaqtitaulauqtuq inigijanga ilaunginnarniaqtunut ICC–kut Ukiuqtaqtumi Katimajinginnut, ammalu **nalunairlugu** Ukiuqtaqtumi katimajiit sivulliqpaunginnarmata timiullutik piliriqatigaqtutik Ukiuqtaqtumi nunalirjuangujunik ammalu nunaqaqqaqsimajunik ammalu angiqsimattiaqtut kajusitittijumallutik saimanirmik, makitattiarnirmik ammalu piliriqatigiinnirmik Ukiuqtaqtumi, **tiliurlugit** aviktuqsimaniujut ajjiungittumik qanuilinganiqarlutit ilauqattarnirijanginnut ilaunginnarniaqtunut ajjiititaulutit isumaliurutaunut, **tiliurlugit** ICC–kut atangiijumik amma atuutiqattiatukkut ilauqattaluqtit amma tukiqattiatukkut ilauqattarlutit Ukiuqtaqtumi Katimajinginnut piliriqatigainnarlutillu ilauqataunginnarniaqtunik pijjutiqaqtunik katujjinikkut pijumanirijaujunik ilauqataunirmik pilirianut Ukiuqtaqtumi katimajiit piliriqatigiinut ikajuqtuivattut inunnut aulataujunik amma katujjinikkut aaqqittausingimajut qaujisarutiit, qanuiliuniujunut, amma qanuiliurniuvattunut, **tiliukkanirlugit** ICC–kut atuligitaukkannirasullutit atuliqujausingimajut 2024–mi ICC Inigijanganut Paippaaq Sapujjisimajuq amma Sanngattitaugiarlutit Ukiuqtaqtumi Katimajiit;
10. **Tiliurlugit** ICC–kut Atuqtiarnirivattangit Nunarjuarmi Katujjiqatigiit Kiinaujaliurasuannirmut amma Inuusilirinirmut Katimajinginnut (ECOSOC) Uqaujjiqatigiit sivumuaqtauqullugit Inuit sivulliuqtautaujanganit Nunarjuarmi Katujjiqatigiinut, piqasiutillugit nalunaiqtaukannirninga 7 inuusilirinirmut iliqqusilirinirmut aviktuqsimaniujunik taikuuna Nunaqaqqaqsimajut namminiq aaqqissulauqtangita malittugit iliqqusirivattavut, ammalu piliriarivattavut, ammalu ajauqtuunirivattavut ilisarijaujumanirijavut atuqtauninginnullu Nunaqaqqaqsimajut Qaujimajatuqangit pilirianguvalliajunik isumaliurutauvalliajunullu;
11. **Tiliurlugit** ICC–kut sivuligitangit qaujisaqtaunginnuqulugit pivallianiuqut, upalungaijaqtalutit ilaujjutaunut ukua, amma kiuvallutit saqqipalliajunut pijjutaavattut amma nunarjualimaamik angiqatigiigutiujut piqasiutillugit UN nunarjuarmi angiqatigiigutiujut auttajuut mitsaanut, UN Angiqatigiiguti Imarmiutait Uumajuit Ajjiinginniaqtut Kanataup Silataanittut (BBNJ), ilauqatauniq UN 10 Arraagut Aulajjaigiarutausingimajut Nunarjuap Quanguninginnik (attuaniaqtut sikunik amma aujuittunik), aulattiniq silaup asijjiqpallianinganut qanuiliurutissanik ammalu nunamik sanajiunirmut, ammalu sivunissami angiqatigiigutauniaqtut attuaniaqtut Qitiani Ukiuqtaqtumi Tariungani;
12. **Nalunaiqsikkannirluta** Inuit Qaujimajatuqangit aaqqissuivammata tukisiumanirijattinni malittutik ammalu kisulimaani attuanirijattinni, iljausingammata kinaunittinnut, pimmarigijattinnut, uppirnittinnut, ammalu nunarjuarmi taututtatinnut, ammalu pivalliatittinaqta ammalu atuinnaarlutigulu ajjiungittuujut qaujimanirijavut. **Tiliurlugit**

ICC-kut ajauqtuinginnaqattaqullugit nunarjualimaami ilisarijaujjutingitigut Inuit Qaujimajatuqanginni ammalu **tiliurlugit** ICC-kut saqqijaaqtittiinaqullugit titiraqtausimaninginnik ammalu atuqtauninginni Inuit qaujimajatuqangit ammalu saqqijaaqtittillutit sapummijausimaninginnik taakkua atuqtauningit nutaat qarisaujakkut;

13. **Nalunaiqtaulutit** ajjigiitittiniujut amma pittianikkut ilautittiniujut amma atuqtauningit Nunaaqaaqaaqsimajut qaujimajatuqangit amma Inuit sivuliqtuujariaqarnirijangit qaujisarutitut tusaqtauqullugit isumaliurutauvattut, atuagait, qaujisarniujut, qaujisarutaujut, nauttiqsunirmut piliriat, amma gavamalirinirmut, **nalunaiqtaukannirluni** *Ukiuqtaqtumi Inuit Malittauqujangit Ajjigiitittinirmut amma Pittianikkut Ilautittiniujunik*, amma **tunngasuttitaulutit** atuliqujausimajut *Sivumuaqtitaulutit Inuit Qaujimajatuqangit Atuqtaulirunnaqtut Unikkaa*, **tiliurlugit** Ukiuqtaqtumi aviktuqsimaniujut ilisarijauningita Inuit pijunnautingit titiqqanik namminiqarnirmut, amma **tiliurlugit** ICC-kut aaqquisuqtauninginni malittaujarialit Nunaaqaaqaaqsimajut titiqqanik namminiqarnirmik amma aulatauningit piqasiutilugit sapummijausimaniujut;
14. **Tiliurlugit** gavamalimaat, ilinniarviit amma qaujisarviujut amma kiinaujaqaqtittijiujut kiinaujaqaqtiququllugit inunnut aulatauunik qaujisarutitut, gavamalirinirmut, amma titiqqanik aulattinirmut; pivissaqatittiniq kinguvaariinut nuttiriniujuq Nunaaqaaqaaqsimajut Qaujimajatuqanginni; ammalu katujjinikkut saqqijutissanik qaujimajaujunik qanuqturuutissanik, ammalu **tiliurlugit** ICC-kut sanaqulugit saqqiqtausimajunut unikkaangani 4-ngani Ukiuqtaqtumi nunarjuarmi katimavijjuarnirmi Ukiuqtaqtumi Qaujisarnirmut Parnainirmut amma piliriqatigainnarlutit Nunarjuarmi Ukiuqtaqtuup Arraagungani 2032-2033 pannainirmut piliriangujunik;
15. **Tiliurlugit** ICC-kut saqqijaaqtitauningani inunnut aulataujut qaujimanirijaujunut katujjiniujuq amma saqqiqtauningit pijjutiqaqtut katujjinikkut iliqqusirijavut, piqqusituqavut amma piusirisimajavut, suurlu qimussirniq, qajaqturniq amma umiakktut atuqtauvattut, piqqusituqakkut pinnguarniujut, amma mamisautit piruqtuminirnut ammalu asinginni uumajunik, piqasiutilugu inunnut aulataujut ittarnisaliriniq. **Tiliurlugit** gavamalimaat, ilinniarviit, takujagaqarviujut, ammalu namminirijaujut nuattiviujut piliriqatigaqullugit inunnik utiqtititauninginni inuup sauniminingit ammalu iliqqusituqattigut sunatuinnait pijausimajut;

**Inuit Angunasuttiit amma Niqiqattiarniq – Sapujjausimaningit Inuit Nunaqutingit, Imaait, Uumajuit amma Sikuit**

16. **Nalunaikkanirlugit** Inuit niqiqattiarunnangimmata Inuit niqinik namminiqangippata,

pijjutiqatuinnangittuq inuunasuarnirmut, pimmarigigattigut kinaunittinnut, iliqqusittinnut amma isumakkut qanuingittianitinnut, amma **ilisarijauluni** attuanigallarimmat avatiup asijjiininganut, silataaniinngaaqtunik attuiniujunut amma silataaniinngaaqsimajunik pijumanirijaujut nuqqangatittimmat pijunnautittinni amma atuinnaqarnitinni niqituqattinnut, **tiliurlugit** gavamalimaat angiqtauqullugu sulijukkut katujjiniujuq aulattiqatigaqullugit inunnik, **tiliurlugit** ICC–kut sapujjisimainnaqullugit amma sivumuaqtittiinnarlutit pijunnautingita Inuit angunasugunnarnirmut, iqalugasugunnarnirmut, amma katiqattarunnarlutit Inuit Nunangani, piqasiutilugit imangit amma sikungit, ajauqtuilutit nalimugiiliqtitauninginni maligaqtigut aaqqissimaniujut inunnut aulatauvattut atuqtauqattarninginni, ammalu quvvariataulutit sivulliqaupaujavut ammalu aaqqigutissavut nunarjuarmi katimaniujuni uumajuit ammalu uumajuit ajjigiinnginniqaqtut sapummijauninginnut;

17. **Tiliurlugit** ICC–kut tukimuaqtitaqullugit qaujimajitarnut katujjauniaqtut amma piliriqatigiillutit qaujisarutaujunik Inuit Nunangani sanngattitaugiaqullugit aulatauningit iqaluit, uumajuit amma imarmiutait Inunnut pijaujariaqaqtut, amma piusivaallititaqullugit atuinnaujut nunalinnut sanajauvattut niqissataarijauvattut, amma **tiliurlugit** Ukiuqtaqtumi Inuit Uumajulirijikkut Katimajiralaangit (CIWC) iqqanaijainnaqullugit atausiulingajumik Ukiuqtaqtulimaami Inuit nipiqaqullugit pijjutigillugit atuinnaqarniq, katujjiniq, aulattinirlu uumajulirijjutiit, ilisaqsilutik piliriangusimajunik turaangallarittunik Inunnut, qaujisaqtinut ammalu piliriqatigijaujunut aulatauninginnut tamakkua ikajuutissat;
18. **Iqqaumaluta** uqausirijaulauqtunik Ukiuqtaqtumi Inuit Katimavijjuarnirilauqtanganni 2023-mi, **nalunaiqtauluni** Ukiuqtaqtuq attuanigarninga nunarjuarmi imarmiutait uumajunginni sijjami, imarmi ammalu imattiavammi, nuuqattarningit pujiit, iqaluit, ammalu timmiat, **nalunaiqsikkannirluta** turaagarijattinni, tarnikkut piliriqatigiinnirjavut imarmiutanut kajusitittiinarmat inuqutittinni, iliqqusittinni, ammalu inuusirijattinni, **takunnaqtiuluni** katappallianingita pimmarijut imarmiutait uumajuit piqasiutilugit tariurmiutait iqaluit Juukaanmi amma Kuskutvim kuunginni Alaaskami, ammalu **tiliurlugit** gavamakkut angijuqqautingit piliriqatigaqullugit **inunnik**, maliqullugit kajusiinnarunnaqtunik aulattinirmik atuagarnik uumajuit utiqtitauqullugit, qanuinngittiaqullugit uumajuit, ammalu niqiqattiaqulluta;
19. **Ilisaqsiluta** ICC–kut piliriarilauqtanginni Sitaakhum Angiqatigiigutimi Nungujuittunut Sururnaqtunik (POPs) ikajurniqaqsimammat uukturaqtajunnaqtumik mikilligiaqtittinasunnirmik ilanginni POPs Inunnut, **tiliurlugit** ICC–kut sivumuaqtittiinnaqullugit ajjigiimik nunarjuarmi tukisiumajaujunik attuinirivattanginni sururnaqtut qanulimaattiaq uumajuni piqasiutilugit attuijjutaullarippattut Inuit timinginnut taakkunanngat Inuit niqituqanginniingaaqtunik, ilauqataulutit Minimata

Angiqatigiigutingatigut Savirajalirinirmuungajunik, Sitaakhum Angiqatigiiguti POPs, ammalu asingit katimaniujunut;

20. **Tiliurlugit** qaujisaqtiit, ikajuutissanut angijuqqaat, piliriviit, kiinaujaqtittijiit, amma gavamait atuliqtittiqulugit Inuit qaujisarninginni sivuliqpaaqujanginni amma katujjinikkut saqqiilutit qaujimanirijaujunik, aqqissuiqatigiillutit tunngavissaujunik titiraqsimaqunik ammalu sivumuaqtittilutit nunalinni nauttiqsumnirmut pilirianik qaujinasuarlutik attuinirijaujunik ammalu tusaumatittilutit isumaliurutauniaqtunik kamagijauqullugit ulurianarutaujut Inuit niqissaqattiaruaqarninginni;
21. **Nalunaiqsilutit** Inuit nunalingit sulit attuqtauqattalarimmata sukajummarialummik silaup asijjiqpallianinganut ammalu Ukiuqtaqtuq uqquusivallianinganik pingasuaqtilluaqtumik tisamairarluguluunniit sukanissaujuq nunarjuarmiut saniani, **tiliurlugit** ICC-kut kiggaqtuinginnaqullugit Inunnik nunarjuarmi silaup asijjiqpallianinganut qaujisainirmik ammalu atuagaliurnirmik katimaniujunik, piqasiutillugit Nunarjuarmi Katujjiqatigiit Aqqissimaninganut Angiqatigiiguti Silaup Asijjiqpallianinganut ammalu Gavamauqatigiit Katimajingit Silaup Asijjiqpallianinganut, ajauqtuiqullugit nunarjuarmi aulajjaigiarutit killiqaqtittiqullugit nunarjuarmi uunaqsivallianirijanga 1.5 Tiguriismut quttiniqsaummat sanavijjuarnut uunarnirijanginni;
22. **Iqqaumaluta** silaup asijjiqpallianinganut pirruluuqiniujut nunattinni piqasiutillugit kuujjuarniujut, quanguinnaqtut auppallianingit, sijaup nunguppallianingit, sikuijainiq, ikualajualunnut ammalu silaup asijjiqpallianimmarialungit, attuivattut Inuqutittinnik, nunalittinnik ammalu inuusirijattinnik, ilagijaulluni 2017-mi nuna tisuumanirilauqtanga nuutittilaurnat Nuugaatsiaq amma Iluqsuit Kalaallit Nunaannit, amma Ukiuqtaqtuup Anurirjuanga Muupak (2022) amma Halaat (2025) attuijummarialuulauqtut Inuit nunalinginnik Alaaskami, **tiliurlugit** ICC-kut katiqsuiqulugit tukisigiarutissanik amma tusaqtittilutik qanuq silaup asijjiqpallianinga attuiqattarmangaaq Inuit nunalinginnik amma **ajauqtuijariaqarmijut** gavamanik silaup asijjiqpallianinganut kiinaujat atuinnauniqsauqullugit ilagijaulutik asiujaujunut surattaunullu, sungiutivallianirmut, amma attuiluaqtailittinirmut amma ikajuqtuilutit inunnut–aulataujunik silaup asijjiqpallianinganut upalungaijautinik amma atuagarnik takussautittijut sivulliqpauqujattinni amma piliriangullutik piliriqatiqarnikkut inunnik;

**Inuit Kinauningit, Timikkut, Tarnikkut, Isumakkut Qanuingittianiq amma Qanuingittiarniq, Uqausikkut amma Kinguvaariinut Qaujimanirijaujut**

23. **Tiliurlugit** gavamalimaat ikajuqsuiqulugit amma angilligiatitauqullugit inunnut aulataujut ilinniaqtittijutiit kajunngiqsaivattut inunnik makimattiarunnarnirmut amma kajusittiarunnarnirmut;

24. **Quviasuutigilugu** uqausivut amma aviktuqsimaniujunik uqausiujut tunngavigilugit Inuit kinauningit, iliqqusingit, amma qaujimanirijangit ammalu **ilisarijaujuluni** Nunarjuarmi Arraagunut 10-nut Nunaqaqqaaqsimajut Uqausingit, **tiliurlugit** ICC-kut sapummijauqullugit, saqqijaaqtittilutit, uummatittikaninniq, amma quviasuutauluni Inuit uqausinga kiinaujanik qinirlutit uqausirmik uummatittikannirutissanut, ammalu ikajuqtuqtaulutit sanajauningit akuniujumut upalungaijautiit kajusiinnaqullugit uqausivut, piqasiutilugu saqqijaaqtitauningit atuqtauqattaqtut Inuit uqausingit ICC-kut katimaninginni;
25. **Tiliurlugit** ICC-kut sivumuaqtitauqullugit saqqijaaqtitauningit amma sapummijauningit pijunnautingit Inuit nukappianut amma ilagiinut, ikajuqsuqtaunginnaqattarlutit piuniqpaangujut atuttauvattut amma qaujimanirijaujut nukappianik piruqsainirmik, ammalu piliriarijauluni sapujjausimaninga Inuit iliqqusinga tunijauniarlutit kingulirmik kinguvaassatinut;
26. **Tiliurlugit** gavamalimaat kiinaujaqaqtittiqullugit amma piliriqatiqaqullugit inunnik saqqijaaqtitauningani amma sapummijauninginni Inuit pijunnautingit akituluangitukkut amma naammattukkut illuqaqtittinirmik atuinnaqarlutillu atanangittumik imirmik amma salumanirmut, ammalu **tiliurlugit** ICC-kut sivumuaqtauninginni Inuit sivulliqaupaujangit attuaniaqtut pijaujariaqaqtummarialuujut makimajjutinik pivalliatittiniujumut;
27. **Tiliurlugit** ICC-kut ikajuqtuiqullugit kiinaujaliurutissanik amma pivalliatittiinarlutit Inunnut aulatauunik, nunalinni tunngavikaqtunik kikkutuinnarnit attanajjaiqsimatittinirmik, piqasiutilugit paliisikkut, iqqaqtuivilirijjutiit, qiniqtiit paqsaijiillu ammalu sivulliqaami kiujit piusivaalliqlullugu attanajjaiqsisimaniq Inuit nunalinginni ammalu turaangallarittumik kamagilugit Kinnguumajaujut ammalu Inuaqtausimajut Nunaqaqqaaqsimajut tuavirnaqtuqaqtillugu;
28. **Iqqaumalugu** ICC *Piqujivungaarutinga 77-13*, tiliurijuq Ukiuqtaqtumi Aviktuqsimaniujunik pivikaqtittiqullugit isumaqsurlutik killikaqtitaunngillutillu ingirratittijunnarnirmik inulimaanik Ukiuqtaqtulimaami nunagijattinnut ammalu **tiliurlugit** ICC-kut piliriqatiqainnaqullugit namminiq aviktuqsimanirijaminik pijailutit avviarutaujunik isumaqsurunnarnirmut ingirrajunnarninginnullu Inuit Nunanganilimaattiaq, iqqanaijariaqturlutik, ilagiinuurunarlutit, asinginnulluunniit;
29. **Nalunaiqsilutit** Inuit kajusijunnattiarningit tunngaviqarmata aanniaqarnangittulirinirmik qanuinnngittiarnirmillu, **ilisaqsilutillu** Inuit aanniaqaqtailimaningit qanuinnngittiarningillu atangirmata, ilaliujjisimallutik timikkut isumakkullu qanuinnngittiarqarnirmik, qiturngatta ilattalu qanuinnngittiarninginnik, uqausittinnik atuqattarniq ammalu

sanngijumik iliqqusiqarniq amma kinaunirminillu ippigusunnirmik, ammalu **tiliurlugit** gavamalimaat ilisaqsiqulugit attuijjutaullarippattunik inuusirmut kiinaujaliurutiqarasuarnirmullu pijjutaunut attuiniqarmata Inuit qaniingijjutinginnut amma qanuinngittiarutinginnullu, kiinaujaqaqtittilutillu inunnut aulatauunik ammalu – sanajausimajunik aqqissimaniujunik, pilirianik pijittirautinillu tunngaviqaqtunik Inuit uppirijanginnik kiujjutauniaqtunik ajjiungittunut assurunaqtunut, Inunnut saanngajauvattut, ammalu angilligiatuqullugit atuijjutaunnaqtut taakkununga pimmaruijunut aqqittausimajunut pijittirautinut;

30. **Tiliurlugit** ICC–kut ammalu Ukiuqtaqtumi Inuit Aanniaqarnangittulirinirmut Tukimuattittijit Katimajiralaangit angilligiatuqullugit piliriangit ammalu qaujimanirijaminik tauqsiiqattarlutit iliqqusirmuungajunik tunngaviqaqtunik isumakktut qanuingittianirmut pilirianik Inunnut inuusuttunut, piluaqtumik imminiiqtailimaniq, piqasiutilugit kajunngiqsaijjutissanik piviqatittilutit, uqausilirinirmut pilirianik, ammalu sanngiliqpaallititaulutit innait inuusuttullu attuaqatigiinnirijangit;
31. **Tunngasuttitaulutit** Inuit Inuusilirijit Katimaningani 2024-mi unikkaa ammalu **tussirarluta** Inuit katujjiqatigii pivissaqaqtittiqullugit qaujimanirijaujunik tauqsiiqattaunirmik piuniqpaanik atuqtauvattunik Inuit Nunangani Inuit aqqigutissanginnik aanniaqarnangittulirinirmut qanuinngittiarnirmullu, ammalu saqqijaaqtittiqullugit pigiaqtitausimajunik mamisarutaujunnaqtunik timimmut, isumamut, ammalu uqausikkut kappiasaanirinirmut, piqasiutilugit kinguvaariinut quassaaqtittiqattaniujut;
32. **Quviasuutigilugu** sivulliqaami Inuit Arnait Katimavijjuarnirilauqtanga tunngasuttitaulauqtuq Kalaallit Nunaannit Utupiri 2025-mi, **tunngasuttilugillu** Inuit Arnait Katimavijjuarnirilauqtangata Unikkaalianga ammalu **ikajuqtuiluta saqqijaaqtittilutalu** Inuit Arnait Katimarjuarningata Sulinirarutingani ajauqtuijjugijauniarluni sivummuaqtauningani ammalu sapujjausimaningani pijunnautingit Inuit arnait amma nukappiat ammalu **tiliurlugit** ICC–kut qimirruqulugit aippangani katimavijjuakannirutaujunnaqtumut Inuit Arnanut;

### **Inunnut Tunngaviqaqtut Namminiqarniq amma Kiinaujaliurasuarnirmut Pivalliatittiniq**

33. **Nalunaiqsiluta** pijunnautigijattinnik namminiqsurunnarnirmut ammalu **tiliurlugit** ICC–kut nalunaiqsiqulugit pijunnautittinnik nunamiutanik Inuit Nunangani ammalu sivumuaqtittilutit inunnut nalunaiqtausimajunik pijaujariaqaqtunik kamattiarlutik nunamiutanik pivalliatittinirmik ammalu **tiliurlugit** gavamalimaat kamattianasuqullugit nunamiutanik pivalliatittinimut katujjiqatigarlutik inunnik nalimugiittitauqulugit ammalu ikajuqullugit sannginiqsamik kiinaujaliurutiqarasuarnirmut, inuusilirinirmut, amma

iliqqusilirinirmut pivalliatittinirmik amma piusivaallititauluni nunalinni sapiliqtailiniq;

34. **Tiliuvlugit** ICC–kut qimirruinnaqulugit aulajjaigiarutissaugajaqtunik pivissaujunnaqtunik saqqijaaqtittiqullugit sapummijauqullugillu Inuit pijunnautingit isumaqsurlutik niurrutiqarunnannirmik, tauqsiiqattautijunnaannirmik, tauqsiiqattautijunnaqullugit ammalu aullatijunnaqullugit niqituqattinnik aviktuqsimaniujunik nunalirjuanik, tunngavigijauluni kinaunivut, iliqqusivut, niqinik namminiqarnivut ammalu kiinaujaliurasuanirmut makimainnarunnarniq; tukisigiarutissait tammaqsimajut nuqqaqtitaqullugit; ammalu kamagilugit kanatami nunarjuamillu maligait ammalu atuagait ilisaqsisimangittut ammalu ikajuqtuingittut Inuit pijunnautinginnik ammalu sivulliqpauqujanginni, ammalu tussirarlutik aviktuqsimaniujunik nunalirjuanik piijaqtuqullugit apuqtarutauvattut Inunnut tauqsiiqattautinirnut malittut pijunnautittinnik taakkununga nunamiutanut;
35. **Tiliurlugit** ICC–kut aaqqissuiqulugit qaujimanirijaujunik tauqsiiqattautiniujunut Inuit namminiqaqtinginnut, saqqijaaqtittitutit piliriqatigiinnirmik Inuit namminiqaqtiujut katujjiqatigiinginnut ammalu pivalliatittinirmut kuapurisanut ammalu qaujimattiaqullugit kiinaujaliurutaunasuaqtut ammalu ikajuutissat inunnut pisimajaunginnarlutit, **ilisaqsilutik** piliriangusimajunik 2022-2026-mi katimajiuniulauqtumut saqqiilutit avviarutaujunik inuit-inunnut namminiqaqttut piliriqatigiinnikkut ammalu tiliurlugit ICC aulattijiit katimajingit saqqiiqullugit ammalu saqqijaaqtittitutit unikkaaliamik tamatuma mitsaanut, piqasiutilugit atuliqujaujut, ammalu tiliurilutik nunarjuarmi Inuit Namminiqaqttunut Katujjiqatigiinginnik kajusitittittiaqullugit piliriaminik ikajuqsuijjutauniarlutit Inunnut namminiqaqttunut;
36. **Tiliurlugit** ICC–kut ikajuqtuiqullugit Inunnut aulataujumik iqqanaiajaqtinik pivalliatittinirmut pigiaqtitausimajumik, kamagijaqarlutik ajjigiitittinninniujunik ammalu sivumuaqtittitutit saqqijaaqtittitutillu ammalu sapujjausimalutit iqqanaiajaqtit pijunnautingit Inunnut piqasiutilugit ajjigiitittiniq pivissaqaqtitaunirmik, kamagijauninginni ammalu akiliqsuqtauninginnik, ammalu tiliurilutik ICC–kunni ujjirusuqullugit ajjiungittunik assurunaqtunik saanngajauvattut inuqutittinnut nuuqattaqtut nunalinnut iqqanaijariaqtutik, ilinniariaqtutik, uvvaluunniit asinginni pijjutiaqtutit;
37. **tiliurlugit** ICC–kut ajauqtuiqullugit pivalliajulirijinik ammalu kiinaujaliurutaujunnaqtunik Inuit Nunangani, piqasiutilugit sapujjisimaniq, qiniqtiit ammalu paqsaijiit, tuavirnaqtunut pannaisimattiarniq ammalu kiujjutigijaujunnarninginni ammalu asinginnut kikkutuinnarnut kiinaujaliurutaujunnaqtunut, ippigusuttiaqullugit Inuit pijunnautinginnik namminiqsurunnarnirmut ammalu namminiq aulattijunnarnirmut, tusaumatitaulutit Nunaqaqqaaqsimajut qaujimajatuqangit, ammalu pitaqaqtittitutit takussaujunik nunalinni ikajuutissanik, ammalu ikajuqtuulutit inuusittinik;

## Inunnut Aulatauut Imarmiutanik Aulattiniujut

38. **Ilisarijaulutit** Inuit tariurmiutaummata, Ukiuqtaqtumillu tariurmiutat pimmarialuummata qanuinnngittiarutittinnut, qanuinnngittiarutittinnut, nunagijattinut, amma inuujjutitittinnullu, ammalu **tiliurlugit** ICC-kut saqqitittivallianginnaqullugit aulatauqumik qanuqtuurutissamik sapujjiniarlutit amma saqqijaaqtittilutit Inuit pijunnautinginnik, namminiqsurunarnirmik, atuqtauninginnullu Nunaqaqqaqsimajut qaujimajatuqangit pimmarialunnut imarmiutalirinirmut katimaniujunik, ammalu nalunaiqsilutik Inuit sivuliqtiuninginnik qanulimaattiaq imarmiutanik aulattinirmik, sanaqullugillu ICC nunarjuarlimaamik imarmiutanik aulattinirmut upalungaijautimik;
39. **Quviasuutigilugit** ICC-kut initaarisimajanga Ilaunginnarnianirmut Nunarjua Imarmiutalirinirmut Katujjiqatigiinginnut (IMO), ammalu sivulliqaangulluti Nunaqaqqaqsimajut katujjiqatigiingit taimaittumik ilisarijaujjutitaaqtut, **tiliurlugit** ICC-kut sivuliqtingit sanaqulugit piliriassanut pannautimik atuutiqaattiatukkut atuqattarlutit taassuminga ilisarijaujjutimik tavvani IMO-kunni ammalu **tiliurlugit** ICC-kut ikajuqsuqtauninginni inunnut aulatauut upalungaijautit nauttuqsuiqulugit amma killiqaqtillugit attuijjutaujut amisuruqpallianinginnut umiarjuat ingirraqattarniujut, piqasiutilugit pularaqtulirinirmut attuiniujut, Inuit nunanginni amma piqqusituqakkut atuqtauvattut nunanginni, ammalu Inuit attuqtauluangikkaluarmangaata asijjirutaujunut usijulirijinut amma umiarjuanut malittaujarialiit, ajauqtuilutit IMO-kunni ammalu asinginni katimaniujuni;
40. **Tilisilutik** ICC-kunni ajauqtuiqullugit umiarjuanut aqqutissanik ammalu asinginnik mikilligiaqtittinirmut qanuqtuurutissanik katujjiqatigarlutit Inunnik aaqqisuqtauningani ammalu tusaumatitaulutik Nunaqaqqaqsimajut Qaujimajatuqangit, ammalu ajauqtuilutit Inuit atuinnaqarunnarningit ammalu ilauttiarunnarlutit umiarjuat qaujimajaunasunninginnut ammalu nauttiqsuqtauninginnut, piqasiutilugit qangallarikkut tusaumaqattautijjutissanut pilirijjusinik, ammalu inunnut aulataulutit qanuqtuurutissat umiarjuat ingirranirijangita aulattijjutinik amma tariurjuarmi attanajjaiqsisimaniujunut;
41. **Tililugit** ICC-kut saqqijaaqtittiinnaqullugit atangiijumik ammalu atuutiqaattiaqtumik ilautitauninginni ammalu tukiqattiaqtukkut ilautitauqattarninginni Inuit aaqqissuqtauningani sivunissangita Ukiuqtaqtuup imarmiutangit ammalu iqalulirinirmut aulattiniujut, piqasiutilugit atuagaliurniq, isumaliurniq, qaujisarniq, ammalu aulattiniq, piqasiutilugit sivumuaqtittilutit Inuit sivuliqtiuninginni ammalu Inuit Qaujimajatuqanginnik tavvuuna Angiqatigiigutitigut Angiqatigiiguti Maligaqaqtittingimmat Tariurmi Iqalugasuarnirmik Qitianani Ukiuqtaqtuup Tariungani;

42. **Tiliurlugit** ICC–kut aaqqissuiquullugit sivulliujjauqujaujunik sivunissanganut Qitiani Ukiuqtaqtuup Tariurjuangani (CAO) ilautittilutit inunnik; sivumuaqtittilutit Inunnut aulattijussanik gavamalirinirmut; saqqijaaqtittilutit qanuqtuurutissanik ; tussirlutik qanutuinnaq pivalliatittiniujunik makimaquullugit Inuit pijunnautingit, piqasiutilugit pijunnautingit atangijukkut ammalu atuutiqaqtiaqtukkut ilaujunnarninginni ammalu tukiqaqtiaqtukkut ilaujunnarningit isumaliurutaunut, atuqtauttarlutik Inuit Qaujimaqatugangit; ammalu qimirrutarlutit ammalu kiuttiaqattarlutit attuijutiujunik piliriangujunut suurli tariup akiani umiarjuakut ammalu tariup iqqangani ujararniarniujut tamaani CAO-mi;
43. **Quviasuutigilugu** pilirianguvallaiajuq Pikialasorsuaq pigiaqtitausimajuq, piqasiutilugu 2023–mi titiqqaq angirutausimajuq Kanataup gavamakkunginnut amma Kalaallit Nunaanut, **tunngasuttitaulutit** atuliqujausimajut 2024–mi Inunnut aulataujuq Pikialasorsuarmi katimaniulauqtumi piliriqatigiinut amma ICC Kalaallit Nunaanut *Pikialasorsuaq Tariunginni amma Inuit Qaujimaqatuganginni Unikkaa* ammalu **tiliurlugit** ICC–kut aujauqtuinginnaquullugit atuliquitauninginni 3 atuliqujausimajut Pikialasorsuaq Kamisankunnut;
44. **Angiqtauluni** ICC–kut Tuksirarnirijanga Naalagumanirmik Katimavijjuarningani sapujjausimaninginnut imarmiutait Ukiuqtaqtuup Kanannangani Tariurjuarmi(OSPAR Angiqatigiiguti), saqqijaaqtittiquullugit atangijumik atuutiqaqtiaqtumillu ilauqataujunnannirmik ammalu tukiqaqtiaqtumillu ilautitauninginni Inuit isumaliurutaunut imarmiutait sapummijauninginnut Ukiuqtaqtuu Kanannangani Tariurjuarmi;

#### **Pijunnarnitaaqpallianirmut Qanuiliurutissait**

45. **Nalunaiqsiluta** sannginirijaujunik kinguvaassatta amma **nalunaiqsiluta** ammalu qujaliluta Inuit Inuusuttungit ilautitauninginnut Pilirianganut (IYEP), **tunngasuttillugit** atuliqujaujut IYEP-kut unikkaalianganni, ammalu **tilisiluta** ICC-kunnit qimirruqulugit inunnut inuusuttunut kasumaqatigiigutissanik nunattinni piqasiutilugit pivalliatitauninga inuusuttunut ajurunniiqsatittinirmut piliriaq, tautugaqarlutit pannaijuttissanik amma ilautitaulutit Inuit inuusuttut pilirianguvattut nunarjualimaamik gavamaliriniup mitsaanut amma atuagalirinirmut, ammalu qimirrulutit Katimavijjuaniugajaqtumi Inuit Inuusuttunginnut;
46. **Nalunaiqsikannirniq** ICC–kut piusirivalauqtanginni ilagijaummat Inuit piusirivalauqtanginnut, **nalunaiqtaukannirluni** tautugarijaujuq nunarjuarlimaamik ICC–kut tuqquivinganut pigiaqtitausimajuq, **tunngasuttitauluni** sanajauninga ICC–kut

tuqquivinga pilirijaujuq ICC Kanatami nalunairutauluni Inuit namminiqsurunnarninginnut amma Inuit namminiq titiqqaqutinginni namminiq nipiliuqattarluta piusirijattinni atuinnautiaqullugit Inulimaattianut, amma **tiliurlugit** ICC–kut sanajauningani angiqatigiiguti aulatauniarninginnut ICC–kut Tuqquivinga qimirrukannirlutillu qanuqtuurutissanik titiqqaliriniup mitsaanut amma tuqquqtauqattarninginni ICC–kut piusirisimajangit;

47. **Uqautilugit** ICC–kut piusivaallititauqulugit amma sanngattitaugiaqullugit tusaumaqattauijutiit, amma aaqqissuiqatigiillutit ICC–kut allavvilimaattiangit aturlutit tusaumaqattautinirmut atuagarnik, katujjaujumik titiqqanik tuqquivissamik, inigijaujunik uvvaluunniit atuagarnut paippaanik, piliriassanut pannautinik amma asinginni pilirijjusinik;
48. **Tiliurlugit** ICC–kut tusaqtittijutissanik iqqanaijaarijainik amma qanuiliurutigivattanginni inunnut ammalu kikkutuinnarnut aturlutit qanuittutuinnattianik pivalliajulirijjutinik, Inuit uqausingatigut amma aviktuqsimaniujunik uqausingitigut ammaluttauq asingitigut turaanganiaqatunik uqausiujunut.

**Iksivautaq amma aulattijiit katimajingit inuit ukiuqtaqtumiuqatigiit katimajinginnut  
nalunaiqsivut 2026–mi Iqalunni Suliniraruti angirutaulaurmat  
katimajaqtuqsimajulimaanut 15–giliqtangani  
Katimavijjuarniq Inuit Ukiuqtaqtumiuqatigiit katimajinginnut Julai 25, 2026–mi**

Sara Olsvig  
ICC Iksivautanga

Herbert Angik Nakimayak  
Igvautaup Tungilinga, Kanata

Hjalmar Dahl  
Igvautaup Tungilinga, Kalaallit Nunaat

Natan Obed  
Katimaji, Kanata

Kathrine Bødker  
Katimaji, Kalaallit Nunaat

Marie Kasarṇaaluk Greene  
Iksivautaup Tungilinga, Alaaska

Irina Meshcheriakova  
iksivautaup Tungilinga, Sukakka

Nicole L. Wojciechowski  
Katimaji, Alaaska

Maria Leita  
Katimaji, Sukakka